

Friday, April 18, 2025

Time - 2:30pm - 2:35pm

AKASHVANI AIZAWL
REGIONAL NEWS BULLETIN
(MIDDAY)

FIR

Food, civil supplies & consumer affairs department chuan mipui buhfai ei tur phur a kawng laka hralh rutute lakah FIR an thehlut.

Nimina sorkar thuchhuahin a tarlan danin Mizoram sorkar chuan mipuite hnena buhfai tha, hnianghnar leh buk dik taka pe turin tha thlah lovin theihtawp a chhuah a. Hetih lai mek hian Food Civil Supplies & Consumer Affairs Department in buhfai a lak khawm leh Supply Centre hrang hranga mipui ei tur a sem chhuah tur phurtute'n kawng lakah an hralh thin a ni tih finfiah a ni a. Buhfai hralh thentu lakah First Information Report (FIR) theh luh tawh a ni. Hetiang thil thleng hi FCS&CA Department chuan a ngai thutak hle a, buk dik taka mipui te hnena buhfai pek chhuah kawngah harsatna a thlenin mipui chanvo dik lo taka lak sakna a ni, department hotute chuan an ti a.

Thil dik lo titute dan anga hrem turin Sorkar chuan hma a la zel dawn a, thil diklo titu te do let turin tanrual puiah mipui te a bawk tih thuchhuah chuan a sawi a ni.



LADC FLOOR TEST

Lai autonomous district council (LADC) CEM Pu V. Zirsanga chuan nimin khan tun 2025-2026 tangka kuma hman tur budget pharh mah se, a kaihhruai sorkar fiah a la ni lo.

February ni 24 a district council & minority affairs department hriattirna chhuah hmanga CEM atana Pu V. Zirsanga ruat a nih atanga ni 30 chhungin thlawptu a ngah leh ngah loh fiah tura tih a ni a. Larsap Gen. VK Singh pawmpuina a hriattirna hi chhuah a ni. He hriattirna ang hian February ni 27 khan Pu V. Zirsanga chu Lawngtlai bawrhsap Pu Cheemala Siva Gopal Reddy chuan thutiam tirin CEM atan a la lut a. A thawhpui tur ZPM MDC 9 te pawh EM atan March ni 17 khan lakluh leh an ni.

Hetih lai hian Pu V. Zirsanga kaihhruai sorkarin thlawptu MDC a ngah tawh em tih fiahna atana a sorkar buk ni tura ruat March ni 18 khan EM zinga pakhat Pu BN Thangpuia chuan a hna chanpual a lungawi lovin banna a thehlut a, ani chungchang an chin fel hnu-ah pawh council chairman Pu VL Hmuaka leh deputy chairman Pu H. Lalmuansanga te chu an ban tak avangin sorkar fiahna atan LADC inkhawm koh theih a ni ta rih lova. Pu T. Zakunga hi March ni 26 khan council

inkhawm hmanhmawh kohah chairman atan thlan ni mah sela tun thlengin ZPM sorkar hian thlawptu a neih tam tawk leh tawk loh fiahna a la paltlang ta lo a. Budget hi pharh a hun tawh si avangin an pharh ta phawt a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni. Zanin dar 6 leh a chanve-ah Chanchinthar puan leh a ni ang.



BUDGET

Nimin khan Chakma autonomous district council (CADC)-a CEM chuan kumin tangka kum atana an council sum ruahman (budget) a pharh.

CADC tana 2025-2026 tangka kum sum hman tur ruahman cheng vaibelchhe 230 leh nuai 12 chuang chu CEM Pu Molin Kumar Chakma chuan a pharh a. Cheng vaibelchhe 220 leh nuai 67 chu sorkar tanpuina (grant-in-aid) atanga hmuh tur, hnathawk hlawh atana hman tura ruahman a ni a. Chhiah atanga hmuh tur cheng vaibelchhe 1 leh nuai 45 hisap a ni bawk. VC te hnathawhna tur hi cheng vaibelchhe 1 leh nuai 45 chuang a ni. VC lawmman (hlawh) atan cheng nuai 67, sing 3 leh sang 6 hmu tura ruahman niin hlawh atan ni lo cheng nuai 77, sing 9 leh sang 8 ruahman a ni bawk a ni.

CADC inkhawmah hian tun hnai a boral EM Pu Sanjeev Chakma sunna hun hman a ni a. CEM-in sunna thu sawiin amah zahna lantir na'n ngawi rengin an ding bawk a ni. CADC budget pharh tak hi Thawhtanni-ah sawiho a ni ang.



RABIES

Thenawm Manipur state-a Churachandpur district-ah ui-a hri nasa taka a len avangin Mizoram district hrang hranga hrileng hi a lo luh ve lohna tura tanlak a ni.

Aizawl district leh Saitual district hi Churachandpur nena ramri intawm an nih avangin district thuneitute hmalakna a langsar zual a. Aizawl leh Saitual district, a bikin Manipur ramri hnaihah ui-a hri venna lak hna kalpui chhoh mek zel a ni a. Aizawl khawpui a Vety polyclinic-ah pawh ui za tel tak meuhvin ui-a hri danna hi an la tawh a. Chutih rualin khawpui chhunga veng hrang hrangah vety department hnathawkte'n kal chilhin ui-a hri danna hi an pe bawk a. Aizawl leh Saitual district bakah district dang bawrhsapte chuan ui-a hri leng chungchangah hian thupek chhuahin ui leh uisa lakluh khap a ni a. Ui neite'n ui-a hri laktir vek tura tiin, pawna ui chhuah khap a ni bawk.

Nimin khan Aizawl bawrhsap pisa-ah bawrhsap Pu Lalhriatpuia kaihhruaiin thenawm state Manipur atanga ui leh a sa lakluh khapna thupek lo tihchhuah tawh

bawhzuiin an thukhawm a. Aizawl District huam chhung a Local Council leh Village Council te kaltlang a ui â hri danna la leh la lo awm dan dinhmun lakkhawm leh hri danna la la lo te hnen a pek dan tur ruahmanna siam a ni. He thutkhawmah hian April thla atanga Sawrkar atang leh private clinic atanga ui-a hri danna pekchhuah dan report ngaihthlak a ni a. Ui-a hri awm dan leh a thawh dan te, a in kaichhawn dan te ngaihthlak a ni bawk.

